

6

4-D

64

6

4 K

13

Ex Bibliotheca  
majori Coll. Rom.  
Societ. Jesu

29

E

60


29


B

6

6-4-D-64

223/27






FRANCISCI NORCIA

ADVOCATI ROMANI

AEGYPTII JURIS


SPECIMEN.



R O M A E

EXCUDERAT LINUS CONTEDINI

MDCCLXXXII.



( 3 )

AD EMUM ET REV<sup>M</sup>UM D.

FRANCISCUM CAESAREUM  
DE LEONIBUS

S. R. E. CARDINALEM

AESINAEQUE ECCLESIAE EPISCOPUM.



**C**UM multa veteres , **CARDINALIS**  
**AMPLISSIME** ad animi informationem ,  
societatisque humanae commoda promo-  
venda egregie instituissent , tum ferven-  
tissimum illud omni aetate praestantissi-  
morum hominum studium enituit extera-  
rum gentium mores , institutaque invisere  
atque inde vitae exempla sibi facere. Hinc

*divinus ille , qui , Venusino monente - nil molitur inepte - , quo Laertiadis consilium , sapientiamque commendaret , sat habuit eum dicere - virum , qui mores hominum multorum vidit , et urbes - Et sane qui externa omnia contemnunt , nimioque patrio amore elati , nil , nisi domesticum , in pretio habent : nae isti , quam extollere cupiunt , patriam , temeritate sua deprimunt , pessumdant . Ecquis enim adeo naturae ignarus est , qui nesciat , hominum commercio , ingeniorum vim quam maxime crescere ? Nonne populorum , tum loci , tum regiminis , tum instituti opportunitates diversissimae diversas quoque artes , vitaeque adjumenta requirunt ? Quare alibi nauticae artis , alibi agricolationis , alibi bellandi ratio feliciter alio florebit . Quid igitur praestantius , quam a cunctis optimum seligere , atque in Reipublicae suae usus apte derivare ? Summa haec ferme prudentia Romanorum fuit , de quibus Caesar apud Sallustium gravissime dixit - Majores nostri neque consilii , ne-*



que audaciae umquam eguere : neque superbia obstabat , quominus instituta aliena, modo proba erant , imitarentur . Arma atque tela a Samnitibus : insignia Magistratuum ob Thuscis pleraque in sumperunt : postremo quod ubique apud socios, aut hostes idoneum videbatur , cum summo studio domi exequiebantur : imitari, quam invidere bonis malebant - *Quod quidem his maxime disciplinis praestat, quibus animi eruditio, ac hominum felicitas continentur : Philosophiam dico, ac legum scientiam. Veritatem quippe, cui prima studet, vel ex populorum consensu haurire licet : certe autem ex aliarum gentium moribus datur secernere quid a Natura, quid ab hominum institutione repetendum sit ; quando ea est naturae vis, ut in omnes, modo homines, aequè agat, dominetur . Hominum vero felicitas, ac salus ex infinitis eisque inter se diversissimis rationibus coalescit, quas tenere omnes prudens Legumlator debet : facile autem haec omnia assequatur, modo, post-*

quam aliarum Civitatum statum attenderit , noscat quoque instituta , quibus hae diutius se integro loco servare valuerint . Huc spectabant difficiles illae peregrinationes , quas veteres Philosophi , ac Legumlatores obibant , quo quo aliarum gentium prudentia cives suos rectius gubernarent , atque erudirent . Traditum id , ut TU minime ignoras , de Carneade , Accademicorum principe , de Zenone Stoeae institutore , aliisque multis , quos mittam ne nimius sim . Praetereundus vero non est Samius Pythagoras , qui Aegyptum , Persidem , Indias , Gallias peragravit , quocum Sacerdotibus , Magis , Bracmanibus , Druidisque de philosophia ac legibus sententias conferret antequam Crotoniatibus nova jura constituere parasset . Idem celeberrimus Atheniensium Legumlator , Solon expertus est , ac tandem Majores nostri , qui Italiam , Graeciam perlustrandas antea duxerunt , quam XII. Tabularum celebratissimo juri condendo manus admoverent .

*Tanta hoc sapientissimorum hominum consensione et ipse motus , **CARDINALIS AMPLISSIME** , non inutile plane opus me aggressum arbitratus sum , si de Aegyptiorum , qui scientiarum , ac artium inventores praedicantur , institutis , ac Legibus , quid literis mandarem , **TUOQUE NOMINI PRAECLARISSIMO** inscriberem . Profecto si non scribentis copia , facultasque , argumenti tamen praestantia excelso animo **TUO** digna habenda ab omnibus est . Cui enim obscura summa illa ingenii **TUI** vis , ac sagacitas , qua tot annos justitiae momenta in Urbe ita liblasti , ut omnibus satisfeceris , qui ad **TE** accesserint , ac nunc Populum , Pastoralis **TUAE** ferventissimae curae commendatum , aptissime gubernas ? Cui morum suavitas , orisque comitas singularis , ex qua fit , ut licet nobilissimo sis loco natus , eminentioraque dein **TUA** virtute sis consecutus , neminem a **TE** repellas , omnibusque aequum **TE** praebeas , inmo his , quod modestiae culmen est , remissiore*

etiam *TE* geras? Cui tandem *TUA* omnibus benefaciendi cura, ac sollicitudo qua celsioris dignitatis gradus, *TIBI* meritis parti, potio-rem usum nullum existimes, quam aliorum commo-  
do, atque auxilio inservire, ac quamplurimis opitulari? Id et ego laetissime recordor, quum, *Accademica Palaestra* vix emensa, a mei  
amantissimo *Patruo*, quem *TIBI* longo beneficiorum ordine devinxeras, ad *TE*  
delatus, confestim tanta gratia, nescio qua re, abs *TE* sum cum-  
latus, ut *TE* auctore uno, altero a vigesimo aetatis ar-  
no nondum exacto, ad illud juris, sapientiaeque *Sacrarium*, atque *Asylum*, *XII.*  
virorum stlitibus judicandis collegium pe-  
nes eximium qui *TIBI* successerat, cujus-  
que erga me benefactorum memoria num-  
quam intereat, *Decanum* accedere mihi  
datum esset. Quam facilis, ac larga mi-  
hi tunc discendi occasio oblata, rerum  
dijudicandarum varietate, responsorum sa-  
pientia, doctorum hominum congressu, ac  
consuetudine! Utinam quid boni hausis-

*sem! curasse vero profitear. Ita si quando vacuum a iurgiis tempus incidebat, illud ego in vetustatis notitia, ac philosophia, quas Jurisprudentiæ socias, atque adiutrices semper tenui, libentissime collocabam. Hisce e studiis factum est, ut gravissimi Populi leges, mihi excolendas susceperim: quod quamquam multi perdocte expedissent, desiderata tamen mihi videbatur methodus quaedam, quae, quum jura suis locis tractaret, ita nec historici tantum, aut philosophi munus praeseferret. Quare ita rem temperare molitus sum, ne philosophandi studium a factis, neve antiquitatis amor a veritate legentem abduceret. Quaedam hinc de Aegyptiorum moribus, et Theologia in antecessum notavi, ut legum vis aptius deprehenderetur: praeterea Aegyptii Juris specimen quinque Tabulis distinctum exhibui.*

*Accipe igitur, CARDINALIS AMPLISSIME munusculum hoc, exile licet, maximum vero, quod mearum virium tenuitate largiri potuisset, grati animi,*

quem **TIBI** aeternum habeam , pignus ,  
humanitati **TUAE** non injucundum , ut  
spero , ac summa , quae **TIBI** numquam  
aberit , clementia , et bonitate , meos impa-  
res nisus aequo fer animo , immo augeas ,  
secundes , obsequio summo , flagito , im-  
ploro .



## DE ÆGYPTIORUM MORIBUS

## THEOLOGIA

JURISQUE CONDITORIBUS .

## CAPUT .

**A**eris clementia, solique feracitate, animalium, pabulique copia donata Aegyptus ad pacis, felicitatisque studia incolas suos facile perduxit (1). Nam ubi naturae divitiae florent, nec improbo labore victus comparandus, ubi amoenitates, salubritatesque locorum jucundissimum vitae habitum, cultumque exhibent: ibi quisque, patria contentus familiae, rei que suae totus incumbit, nec se inde abstrahi incerto, fallacique saepe lucro pati potest. Arma itaque Aegyptii eo tantum tractabant, quo se ab aliorum

(1) Aristoteles *Metaph.* Lib. 1. cap. 1. Strab. Lib. 17. Diod. Sic. Lib. 1. cap. 2.

vi defenderent , non quo aliena , quae nemini invidebant , dominia turbarent , vesanamque belli gloriam justitiae injuria mercarentur . Ceterum inter eos rigidior vigeat militaris disciplina , qua milites , pacis tempore , corporis exercitationibus ad vim ferendam informabantur , ne segnes , lascivientes homines , quos in Reipublicae salutem alebant , Civitati noxios , hostibus impares experirentur . Hinc Aegyptiorum equitatus mira dextertate , et solertia , sacris etiam Literis commendatus est (1) . Verum , his ad Civitatis tutelam statutis , mites Aegyptiorum animi ad scientias , artesque eas omnes , quibus humana felicitas coalescit quam maxime rapiebantur . Inde autem Philosophiae , bonarumque artium rudimentis conformati , in dulces , socialesque animi virtutes declinabant , quibus in Deos pietas , fides , amicitia , gratus animus inter homines sanciebantur .

(1) Cant. I. 8. Isai. XXII.



Sed divinarum rerum praecipua inter Aegyptios cura habita est. Vitae commodis, locique dulcedine illecti animi ad Superos, unde bona haec in terram delabi putabant, crebro se convertebant, ut felicitas, quam experiebantur, et auctior, et diuturnior inter eos maneret. Illic fere omnia Aegypto religione munita sunt. At multa hac re occurrunt, quae Aegyptiae sapientiae opinionem apud vulgus comminuere. Sedulo tamen expendenda res est, ne durius iudicium in hos temere jaciatur. Principio siquidem animadvertere praestat duplicem Aegypto religionem fuisse: altera, quae vulgi captui magis accommodaretur, ideoque *externa* appellata: altera vero interior, *arcanaque* dicta, certis Sacerdotibus, summisque viris cognita, unde Imperii, privataeque vitae regulae depromebantur. Hoc evincit Sacerdotum quae erat distinctio. Erant enim Sacerdotes, qui *Prophetæ*, *Jerolistæ*, *Jerogrammi*, *Orologhi* dicebantur, arcanae disciplinae partici-

pes. Erant e contra *Pastofori*, *Neocori*, *Camillorumque* ( sic nos romano more ) genus alii, arcanis nondum initiati. Reconditum itaque doctrinae, ac religionis depositum apud paucissimos manebat.

Jam vero si externam religionem intueamur, initio fortasse nos offendat, Numinum, quae colebantur, tum numerus, tum abjectio. Tota siquidem Coelestium familia pluribus gradibus inter se discernebatur, eaque *Parvos*, *Medios*, ac *Majores* Deos complexa est. Postremi tres erant numero. *Juppiter Ammon*, *Isis*, *Osiris*. His succedebant *Medii*, *Daemones* nempe, qui aeris, siderumque motum regebant: Alii autem terra geniti putabantur, adeo ut eorum nidi veneratione quadam indicarentur. Ad hoc, animalia plura divino cultu honorata sunt, nec praestantioris naturae modo, veluti *Bos*, *Leo*, verum et infimae, uti *Canis*, *Lupus*, *Accipiter*, *Crocodilus*, *Ibis*, *Felis*, *Ichneumones*, aliaquae. Postremo, si Satyrarum Scriptori fides est, nec oleribus sui sacri ritus de-

negati sunt. Profecto ita Aegyptiorum religionem irridet Juvenalis (1).

Quis nescit, Volusi Bytinice, qualia demens  
Aegyptus portenta colat? Crocodilon adorat  
Pars haec: illa pavet saturam serpentibus Ibin  
Effigies sacri nitet aurea cercophitheci.  
Dimidio magicae resonant ubi Memnone chordae,  
Atque vetus Thebe centum jacet obruta portis  
Illic caeruleos, hic piscem fluminis, illic  
Oppida tota canem venerantur; nemo Dianam.  
Porrum, et caepe nefas violare, et frangere morsu.  
O sanctas gentes, quibus haec nascuntur in hortis  
Numina!

Eadem fere habet, irrisorum princeps.  
Lucianus (2), aliique.

Verum haec non omnibus aequae probata sunt. Quod enim de oleribus dictum, falsum, atque ex una irridendi lubidine ortum plerique reputarunt. Quod cetera spectat, multae ab viris doctis afferuntur rationes, quae Aegyptiorum reli-

(1) *Satyr. XXIX.*

(2) *Imaginum lib. 1.*

gionem non absurdiorē ea, quae aliis gentibus fuisset, ostendant. Nam, ut fabulas praeteream (quae tamen externarum religionum tunc erant fundamenta), quibus Aegyptii docebantur, antiqua hominum in Deorum perniciem conjuratione, Superos humanam rabiem veritos Coelum liquisse, atque se tantisper animalium formis celasse: haud despicienda ratio illa est, quae ex animalium, quae colebantur, utilitate deprompta fuit. Quod enim magna aliqua utilitate mortales affecisset, id non sine divina vi moveri putabant veteres, causarumque dein obliti res ipsas utiles, quae sensus proxime tangebant, venerabantur. Hoc de Graecis ipsis Sapientibus tradidit Tullius (1) - *Multae autem aliae naturae Deorum* (inquit Balbus) *ex magnis beneficiis Deorum, et a Graecis Sapientibus constitutae, nominataeque sunt. Quidquid enim magnam utilitatem generi afferret huma-*

(1) *De Natura Deorum Lib. II.*

*no, id non sine divina bonitate erga homines fieri arbitrabantur. Itaque tum illud, quod erat a Deo natum, nomine ipsius Dei nuncupabant; ut cum fruges Cererem appellamus, vinum autem Liberrum.*

Non itaque aliis nationibus insipientiores sese praebebant Aegyptii, si animalia ipsa unde utilitas manabat, divino cultu prosequiebantur. Haec sane et Cotta praesentit, quum Epicureorum errorem de Superum inertia exagitans apud Romanum Philosophum - *Ipsi qui irridentur Aegyptii (inquit) nullam belluam, nisi ob aliquam utilitatem, quam ex ea caperent, consecraverunt. Ibes maximam vim serpentium conficiunt, cum sint aves excelsae, cruribus rigidis, corneo, prozeroque rostra, avertunt pestem ab Aegypto, cum volucres angues, ex vastitate Lybiae, vento africo, invectas, interficiunt, atque consumunt, ex quo fit, ut illae, nec morsu, vivae, noceant, nec odore, mortuae. Possem de Ichneuma-*

*num utilitate , de Crocodilorum , de Felium dicere , sed nolo esse longus* - Reque vera Crocodilis Aegyptus ab Lybiae latronibus defenditur. Ichneumonum autem mira utilitas, solertiaque apparent, quum nimiae Crocodilorum propagationi occurrunt. Animal quippe pusillae molis immani belluae damna gravissima affert. Ipsum enim tempus arripit, quo fera abest, tum ova, quae relictas sunt corrumpit, quin edat: dein dum crocodilum somnus occupat hiantem ad Nili ripas, cito se in ejus gulam immittit, inde viscera aggressum, corradit, atque ex ventris tenellula, quam frangit, cute, victor tandem ferissimae belluae evadit.

Gravissima denique alia doctorum hominum sententia circumfertur, quae docet animalia, non qua bruta, sed qua Deorum figuras venerata ab Aegyptiis fuisse. Sane, qui de Iside, et Osiride scripsit, Plutarchus Philosophos ait, divinitatem usque colere, quacumque re, vel inanima, sese prodat, rectius autem in

animatis creaturis : Numen idem , eamdemque providentiam , licet ab omnibus aequè cultam , diversa tamen forma honoratam esse , prout Divinitatis diversae imagines inter gentes sint efformatae . Haec Plutarchus . Huic concinunt recentiores de Gentium moribus scriptores , qui affirmant - *Jeroglyphica* , - quae *sacros nexus* licet interpretari , a novis nationibus frequenter usurpata deprehendi : quod et in Americanis gentibus detectum est (1). Nec a prima hominum simplicitate alienum videtur , quod *ense* , puta , bellum ; *sceptro* , imperium : *flamma* , oculo descripto , Divinitas adumbratur (2) . Eodem ferme pacto Aegyptii , *radios* , *pinnae* , *serpentes* , vitae , excellentiae , pulchritudinis Majoris Dei figuras habebant . Materiam *Isidis* : naturae vim *Osiridis* nomine venerabantur . Ex utrius-

(1) *Conquet dù Mexique liv. I. Conq. dù Perou.*

(2) *Planche Histoire dù Ciel Goguet liv. 2. c. 14.*

que conjunctione *Orum* id est Mundum creatum putabant (1).

Jam, si libeat in signa hujusmodi oculos convertere, facile erit deprehendere multa rectius de Majori Deo Aegyptios sensisse, quam ceteros. Ipsi enim praepotens Deus *nefos*, id est obscurus, mortaliumque intelligentiae impervius dicebatur. Numinis imaginem praeseferebat homo vitta oculos circumdatus, incomprehensibilis naturae signum, atque ore praemostrans *ovum*, primum nempe Mundi semen (2). Eadem designabant ceterae Aegyptiorum Divinitates, quarum caput *circulus*, aut *sphaera* exornabant *radiis*, *pinnis*, *colubribusque* praecincta, vitae, excellentiae, perfectionis Majoris Numinis figura. Ex his juvat jam noscere Aegyptios arcanam, perfectissimam, omnium creatricem Majoris Dei sensisse naturam, quae ex materie, na-

(1) Pluche *L. c.*

(2) Plutarchus *de Iside, et Osiride*.



turali quadam vi calefacta, Mundum efformasset. Gravius hoc profecto de Deo, quam ceterae (Sacrum Populum semper excipio) Gentes, putabant Aegyptii; sed nec de animorum natura infirmiora habebant, dum eos aeternos, poenam, vel praemio post mortem afficiendos, signis praedicabant, quae Philosophi reperiunt expressa Eumenidum, Parcharum, Charontis formis, quas Pyramides praeseferebant, maxime vero mortuorum iudicii, de quibus postea dicemus.

Verum haec adumbrata modo externa Religione vix vulgus noscebat. Summus divinae disciplinae thesaurus reconditis templorum penetralibus asservabatur. De exquisitiori huiusmodi Theologia multae doctorum hominum pervagantur sententiae, quae cunctae inter se constarent, si manerent adhuc libri, quos de Aegyptiorum Religione Mañcton, Chermenisque conscripsere. Nunc vero quisque cogitationes suas arcana disciplina huiusmodi contineri contendit. Hinc sunt,



qui majores Aegyptiorum Sacerdotes Atheos plane fuisse propugnent. Alii e contra ingenio nimium indulgentes, intempestiva pietate moti, ipsa tere augustissima Christianae Religionis mysteria Aegyptiis arcanis enucleata ostendant. Medii inter hos arbitrantur sacris hisce concludi non ignobiles de Deo, animique natura sententias, unde omnis Aegyptiae Religionis causa, figuris sepositis, constaret (1). Postremum hoc, si quid minus temerarii in re obscurissima dici potest, vero similis existimem.

Nam, ut praeteream augustam illam Isidis vocem, quae templo Memphytico prostabat inscripta - *Quidquid fuit, est, erit, Ego sum, peplumque meum nemo submovit* -: in comperto apud doctos manet Isidis mysteria Graecis recepta fuisse, mutatoque tantum nomine *Eleusina* arcana ab his venerata (2). Quid his con-

(1) Confer Agatopistum *Dell' Istoria, e dell' Indole d' ogni Filosofia* cap. 13. v. 1.

(2) Diod. Sic. *Lib. I.* Appulejus de *Asin. aur. lib. XI.*

tineretur disputent inter se , ut lubet , Archeologiae scriptores, nos Tullii auctoritatem libentius sequamur , qui ut res profanis interdicta ferebat , subobscure quidem , non adeo tamen ut inde accuratus lector certam sententiam non hauriret , ea postquam sancta , augustaque dixisset , momentosissimis his verbis describit (2) - *Mihi ( sic Attico Tullius ) cum multa eximia , divinaque videntur Athenae tuae peperisse , atque in vita hominum attulisse , tum nihil melius illis Mysteriis , quibus ex agresti , immaniquae naturam exculti ad humanitatem , et mitigati sumus : initiaque , ut appellantur , ita revera principia vitae cognovimus , neque solum cum laetitia vivendi rationem accepimus , sed etiam cum spe meliore moriendi . -*

Mira profecto scientia , qua , perillustri Philosopho docente , vitae principia , unde in terris felicitas , post mor-

(2) De Legibus lib. II.

tem spes altior hauriretur , tradebantur ! Hoc qui consequi potuisset , nisi Numero aliquod , summum , providum , justissimumque Mysteriis hisce coleretur , quod postquam cuncta lustrasset , providentia sua regeret , bene , vel male merentes praemio , vel poena afficeret ? Non hic plura sequar , ne divinari et ego videar , referam modo augustum carmen , quo Cererem Eleusinis , Aegyptiis , Isidem gloriantem inducit Appulejus (1) , ut magis Divinitatis , quae Mysteriis venerabatur , natura innotescat . - *En adsum ( sic Dea ) tuis commota Luci precibus , rerum natura parens , elementorum omnium domina , seculorum progenies initialis , summa Numinum ; regina Manium , prima Coelitum , Deorum Dearumque : facies uniformis , quae Coeli luminosa culmina , maris salubria flamina , Inferum deplorata silentia , nutibus meis dispenso . Cujus Numen unicum , multiforme , specie , ritu vario ,*

(1) De Asin. Aur. Lib. XI.

*nomine multijugo, totus veneratur Orbis. Inde primigenii Phryges Pessinunticam vocant Deum Matrem: Autochtones Attici Cecropejam Minervam: Cyprii Paphiam Venerem: Cretes sagittiferi Dyctinam Dianam: Siculi trilingues Proserpinam: Eleusini vetustam Deam Cererem: Junonem alii: alii Bellonam: alii Hecaten: Rhamnusiam alii: et qui nascentis diei solis illustrantur Aethiopes radiis, priscaque doctrina pollentes Aegyptii, coere-  
moniiis me propriis percolentes, appellant vero nomine Isidem. -*

Sed haec utcumque existimata erunt, illud perpetuo manebit, moribus, et Religione ita Aegyptios conformatos fuisse, ut saniores, mitioresque leges, quam quae aliarum Gentium tunc temporis essent, apud eos juberi valuissent. Reapse ab divina mente orta jussa reputabant Aegyptii, atque inde Populus ea sanctius servabat: quodque Minos Crete, Pythagoras Crotonae, Pompilius Romae, de Jovis, Inferorum, Egeriae monitis fabulaban-

tur callide , nullo studio suadebatur Aegyptiis, qui tot Deorum sacra curiose celebrabant . Vulgata itaque apud hos fama ferebat Mercurium quendam nomine *Thoyth* , et literis , et legibus Aegyptum donasse . De hoc Mercurio ita Tullius (1) - *Quintus* ( Mercurius nempe ) quem colunt *Pheneatae* , qui *Argum* dicitur interemisse , ob eamque causam Aegypto praefuisse , atque Aegyptiis leges , et literas tradidisse . Hunc Aegyptii *Thoyth* appellant , eodemque nomine anni primus mensis apud eos vocatur . - Haec tamen eruditus viris satis non sunt : hinc multae inter hos de Mercurio Aegypto controversiae excitatae . Principio namque Mercurii duo his agnosci volunt , quorum alter *Thoyth* , vel *Theuth* appellatus , qui leges humanioresque artes docuit : alter , qui haec vetustate temporis oblita penitus , ac deleta restituit , *Trismegistus* nomine decoratus (2) . Amoenissima dein de ejus per-

(1) De Natura Deor. Lib. III.

(2) Mosemius in Cudvort System. Intellect. cap. IV. §. 18.

sona dicuntur. Aliis enim *Adam*, aliis *Enoc*, sive *Joseph*, sive *Canaan* dictus (1). Artapanus apud Eusebium eundem *Moisen* putavit. Sunt, qui ipsum *Mercurium Gallum* alio nomine *Aegypto* veneratum dicant (2). Nec desunt denique qui praeclarum hunc Deum hominum commentis, fabulisque adscribant (3).

Non his longius graviora morer, otia in haec absumat sua, cui salebrosum quidquid, etsi jejunium, exileque inquirere cordi est. Ego vero id unum arbitrer fuisse reapse praeclarum quemdam virum, qui quum artibus, jure, *Aegyptum* sapienter instruxisset, post mortem, *Popularium* amore in *Deorum* numerum ob eximia facinora relatus sit. Hoc quippe frequentissimum apud veteres tradit

(1) Kircher *Oedip. Aegypt.* T. Galeus *Philosoph. gen.* Bochart. *Phaleg. Part. I. cap. 2.*

(2) Christoforus Griesgman *De German. Gent. Orig. et Condit. Hermete Trismegisto.*

(3) Ursinus *De Merc. Exercit. 1.* Conringius *De Hermete medico.*

Tullius (1) - *Suscepit autem* (inquit Balbus) *vita hominum, consuetudoque communis, ut beneficiis excellentes viros in Coelum sancta ac voluntate tollerent: hinc Hercules: hinc Castor, et Pollux: hinc Aesculapius: hinc Liber etiam.* - Celeberrimum Legumlatorem Hermetem Trismegistum consecuti sunt *Menetes*, tum Aegyptiae potentiae et gloriae propagator *Sesostris*, *Boccoris*, qui privati juris auctor fertur, *Asichis*, *Amasisque*, prout temporum opportunitates flagitarunt (2).

Sat haec de juris conditoribus: jam leges aperiamus, quibus Aegypti monarchia regebatur. Has nos ex veteribus scriptoribus, maxime Herodoto, Diodoro Siculo, Strabone eductas, privato studio antiquioribus quibusdam vocibus, quod solemne in legibus sancendis dicit Tullius (3), expressimus, ac quinque Tabulis complexi sumus. Prima, et altera de

(1) *De Natura Deorum Lib. II.*

(2) *Diod. Sic. Lib. I. Strab. Lib. X.*

(3) *De Legibus Lib. II.*



( 29 )

privato jure: tertia, et quarta de publico: postrema de religiosis statuit.

De personarum statu, juribus, contractibus, aliisque sollicita est

## TABULA PRIMA

### I.

NUPTIIS INEUNDIS QUINTRIGENARIUS  
ANNUS JUSTUS ESTO.

### II.

UXORES QUOT VOLET QUISQUE HABETO,  
NISI QUI SACRIS DICATUS SIET: HUIUS  
UNAM MODO DUCERE FAS ESTO.

### III.

FRATRI CUM SORORIBUS CONNUBII JUS  
ESTO.

### IV.

NULLUS SPURIUS INJUSTUSVE FILIUS  
PATRI HABETOR.

### V.

NATOS EXPONERE NEFAS ESTO.

( 30 )

V I.

SI PARENTES LIBEROS MORTI DUERINT,  
TRIBUS DIEBUS EXANIMES COMPLEXOS TE-  
NENTO .

V II.

MULIER PRAEGRANS NOXAM, QUAM FE-  
CIT, NISI PARTU EDITO, CAPITE NE LUITO.

V I I I.

SI QUI NOMEN CONDICAT, DEBITORIS  
JURE JURANDO STILIS DECIDITO.

I X.

FOENUS DUPLUM SORTIS NE EXCEDITO.

X.

DEBITOR, QUI SATIS NON FACIAT, PA-  
TRIS CADAVER CREDITORI PIGNORI DATO,  
EUMQUE DONICUM SATIS FACTUM ESCIT  
NE RECUPERATO.

X I.

FURARI, NISI EI, QUI APUD PRINCI-  
PEM FURUM PROFESSUS SIET, NEMINI FAS  
ESTO .

( 31 )

XII.

ABLATA RES PRINCIPI FURUM DEFERTOR, DOMINUS SI VINDICET, QUADRANS PRETHI SOLVERE DAMNAS ESTO.

XIII.

MEDICUS CORPORA CURANDO MEDICINAM, QUAE SIET, NE MUTATO, SIQUE AEGER NOVO MEDICAMINE INTERIERIT, PARICIDA ESTO.

De connubiorum jure primo loco agitur quando conjugum societas societatum omnium fundamentum est. Hinc Civitates natae, hinc auctae, et perfectae sunt. Principio sera venus statuitur, quod tum sobolis institutioni, tum corporis firmitati apprime convenit. Non haec de annorum numero disputo, verum de legis consilio. Sane nuptiarum immaturitas parum publicae utilitati inserviat, quando rudes, ferventique adolescentiae impetu acti Parentes, liberos, quos susceperint, nec apte regere, neque ad Rempublicam informare valeant. Ad hoc, ipsi, qui

acerbae adhuc veneri operam dederint , fractum , enerve , ac brevi interiturum corpus Societati relinquant . Praeclare quippe a rei physicae scriptoribus traditum est , sanitatis , longaevitatisque principium a fibrarum dexteritate , et robore arcessendum esse . Jam vero immatura venus quantum solidorum firmitati , tam in masculis , quam in feminis , adversa sit perdocte ostendit medicinae decus , Fredericus Olfmannus (1) . Hoc vitarunt probe Germani , validissimum nec non longaevisimum hominum genus , de quibus Tacitus scripsit - *Tarda illis venus , ac pares , validique miscebantur* - et Lacedaemonii , qui nuptias inire ante V. supra XX. aetatis annum neminem sinebant : quo tempore utriusque substantiae , qua homo constat , perfectionem contingere veteres Physici docuerunt (2) .

(1) *Dissert. Physico-Med. I. §. 39.*

(2) Galenus *Lib. ε αφορισμων.*

Plures uxores simul habere, quod Graeci *πολυγαμια* dicunt, lex sinit omnes praeter Sacerdotes, quibus unam modo ducere permittit. Passim id in Orientalibus regionibus jure cautum invenitur, licet in Occidente rarius polygamia statuta deprehendatur, veluti de Graecis animadvertit Petrus Faber (1), de Germanis, Tacitus (2), ac de Romanis res est explorata (3). Ceterum polygamia, quum necessario sobolis bono adversa non sit: nam ex ea proles certa habetur, quod secus est in polyandria, quam tamen divinus Plato in sua Republica probavit: nec primario Naturae juri contraria existimanda est, quae, si esset, numquam ab ipso Naturae Auctore dispensari meruisset Lege veteri, quod sacrae Litterae ostendunt. Multa sed Polygambiae

(1) *L. 2. Semestr. 1.*

(2) *De Moribus Germanorum.*

(3) *Leg. 2. Cod. de Incest. nupt. Leg. 18. Cod. ad Leg. Juliam de Adulteriis.*

insunt incommoda , quae una divina vi tolli posse , cordatus quisque consentiat. Nam conjugalis amor tot intentus uxori- bus , vel friget in omnes , vel in unam modo delabitur: hinc aliae , vana libidine incensae , invidia in dilectae sobolem rapiuntur , eique damna moliri non desinunt : atque ita crebris odiis , rixisque familia exasperata , prolis bonum , ut plurimum , curare non potest . Mala huiusmodi Aegyptii tantum a Sacerdotibus removerunt , quos aliter , divinae rei operatos , et castiores , et a domesticis curis expeditiores esse decebat .

At non facile alteram legem suadeas , qua nuptiae inter Fratrem , et Sororem justae habentur . Ipse naturae sensus ab huiusmodi conjunctionibus abhorret quammaxime , quum fere nemo sororis suae , formosissimae licet , concubitus appetat . Ad hoc , hominum consensus incestuosos hosce complexus exsecratur , quod veterum Tragoedia probat , quum incestuosos huiusmodi , cognito dedeco-

re , in se furentes inducit . Hinc apud plerosque Graeciae populos conjunctiones hae propudiosissimae habitae sunt (1) . Eadem Plato , ac Tullius sensere , qui eas (2) - *nefarium stuprum* - appellat . Postremo expedit Reipublicae , ut hominum amicitia latius usque diffundatur , extraneorum cognationibus , quae ex nuptiis oriuntur , quibus hominum genus , societati accline natura , arctiori vinculo inter se copulatur . Quamobrem , ni vehemens necessitas urgeat , quae , puta , Mundi primordiis fuit , matrimonia haec infamia reputanda sunt . Si quid tamen pro Aegyptiis dici potest , exempla sunt Numinum , quae colebant , Saturni , Jovis , Osiridis , quos Opin , Junonem , Isidem , germanas suas uxores duxisse fabulae narrabant . Falsa itaque Religione , uti pleraque dedecora , et hoc flagitium innectum est ,

(1) Alexander. *Gen. Dier.* 24.

(2) *De Divinatione Lib.* 1.

Quarta lex insontis poenam adimit, tum hominum coercet lasciviam, cui immodestiae suae onus imponit, agnitione liberorum, quos extra jus quaesivit. Divinae dein leges tres sequuntur, quibus Parentum immanitas coercetur, tum et ejus, qui in utero est, saluti consulitur. Hic vero Aegyptiorum jus ceterarum Gentium instituta longe antecellit. Sane Parentum imperium, quod natura ipsa solibus bono induxerat, nonnulli Populi in Tyrannidem verterunt, rati patrium jus eodem ferme modo, quo dominicum, regendum esse. Nemini obscura Persarum asperitas, qui liberis tamquam servis utebantur, adeo ut filiorum obsequium eo uno valde commendaretur, quod horum nemo repertus esset, qui Parentem sponte occidisset (1). Atheniensibus quamvis tanta non licerent, licebat tamen liberos abdicare, et, quod

(1) Aristotel. *Ethic. Lib. 8. cap. 10.* Herodot. *Lib. 1.* Stobaens *serm. 42.* Brisson. *de Regno Pers. Lib. 2.*



crudelius , infantes exponere , quod ex multis Comicorum locis innotescit (1) . Saevum vitae , necisque jus veteribus Gallis fuisse testatur Caesar (2) . Tandem Romani hac re cunctarum Gentium feritatem superarunt , quibus ex Romuli lege filios pignori dare , tertium vendere , ac etiam occidere permissum est . Quae quidem rationis obrobria , et in XII. Tabulas immigrarunt : Tabula quippe IV. jussum erat -

- *Endo liberis justis jus vitae et necis, venumdandique potestas esto* -

- *Si pater filium ter venumduit, filius a Patre liber esto* . -

His vero omnibus sapientiores Aegyptii praeclare secum reputarunt homines , non a Parentibus , sed ab Naturae Auctore pendere : Parentibus quidem sobolis bonum ab ipsa Natura injunctum , hinc eis quoque imperium aliquod , ut hoc

(1) Terentius in *Hauton. Act. 4. sc. 1.* Aristophanes in *Ranis* .

(2) De *Bello Gallico Lib. VI.*

curarent , elargitum esse. Patriam itaque potestatem eam modo probarunt , quae prolis commoda promoveret , non quae saevissime naturae opus abjiceret , atque destrueret . Quare liberorum expositio primo loco vetita est . Si quis vero adeo naturae immemor extitisset , qui filium suum obtruncaret , lex jubet efferatum Patrem , qui partem sui interimere haud horruisset , filium mortuum tribus diebus complexum tenere ; nimirum , ut qui de substantia sua tam inique judicasset , idem , amplexu miserabili , et sani , et tabescentis corporis vices experiretur , atque ita facinoris sui conscientia usque divexatus , haud diversam interfecti filii sortem supplicio inveniret .

Quod de praegnanate muliere , morti damnata cautum est , ne ante partum vitam amittat , id nascituri consulit incolumitati , cui maternus casus nocere non debet . Simile quid sanxit Numa de praegnanate mortua , quam sepeliri , nisi exciso utero , vetuit , uti refert Marcellus (1) .

(1) *Leg. 2. Dig. de mort. infer.* Vid. Anton. Au-

Legis humanitas aequitasque , lucet ipsa per se .

Jam de contractibus lex adest, quae creditas res spectat, qua debitoris jurejurando lis absolvitur . Mirum id profecto fidei indicium est, quod sanctam praesert Populi religionem. De perjurio, tum popularium mores, tum capitalis poena, ut infra videbimus, dubitare non sinebant. Displicet vero maxime immodicum foenus a lege permissum : hoc enim Aegyptii longe superarunt Graecos et Romanos, apud quos lex erat - *Si quis unciario foenore amplius foenerassit, furtum quadruplione luito* - (1) : Peculiare tandem est de pignore inventum, quod Asichi Regi tribuitur, quo nihil firmitus Aegypto esse poterat ad fidem servandam ; quando suorum cadavera vita ipsa cariora habebant Aegyptii, adeo ut improbus putaretur, qui, solvendi mora, Patris sui corpus

gustinum de *Leg. et SC.* p. 130.

(1) Confer Gravinam *Orig. Jur. Lib. II. cap. 47.*

apud alios esse pati posset. Id multo felicius mitissima in gente processit, quam Romae dirissimum Creditorum jus, XII. Tabulis sancitum, quod saepius feritate sua populum ad arma, secessionisque concitavit, veluti ex Livio habetur.

De privatis delictis curat lex, quae furandi rationem moderatur. Nil habeo sane quo haec defendam; nec enim in re turpi natura movear auctoritate Lycurgi, qui Lacedaemone furta impunita reliquit, ratus pueros furandi dexteritate aptius ad militares insidias informari; cui contra Draconis opponi posset severitas, qui furtorum genera omnia morte mulctavit (1). Diodorus tamen, qui haec refert, addit Aegyptios, quum furandi licentia compesci non posset omnino, curasse, quo malum hoc minus laesisset, quod effectum, professione Furis, ac rei restitutione, quadrante modo detra-

(1) Petit. *Al. Leg. Attic. VII. tit. 5.* Gellius *Lib. XI. cap. 18*

cto , quasi negligentiae poena , qua plecteretur is , qui a furibus probe notis satis non cavisset . Quod arrisisse video Seldenio (1), ac Scharrochio (2), qui Aegyptiam legem ex dominii eminentis , quod Summae Potestatis est , jure temperant , defendunt . Sed non facile nobis suaserint juris ejusdem , quod ex publica necessitate una emergit , usum Aegyptios recte statuisse , in quorundam Sacculariorum vafritie confovenda , praesertim quum negligentiorum hominum ipsa natura poena sit , fortunarum suarum imminutio , atque clades , qua perpetuo afficiuntur , quin legis asperitas accedat (3).

Postrema lex sequitur , a Medicis maxime exagitata , qua contendunt humanissimae artis progressus inscite praeceptos fuisse : artes quasque , maxime Me-

(1) *De Jur. Nat. et Gent. Lib. IV. Cap. 2.*

(2) *De Offic. sec. J. Nat. Cap. 2.*

(3) Plura de hac lege quaerentes delegabo ad *Q. Septim. Flor. Rivini Dissertationem De retentione Quadrantis ex furto apud Aegyptios -*

dicinam , longo usu , et naturalium rerum observatione , usque perpoliri : inde inventa adduci , quibus ad scientiae fastigium perveniatur . Ad hoc , morborum , naturam , causasque in infinitum variare , nec omnia ; antiquis regulis posse comprehendendi . His plaudit Aristoteles , qui Aegyptiorum morem barbarum , atque inhumanum appellat . Alii e contra Aegyptiorum sapientiam hoc uno quammaxime extollunt , quod hominum vita per eos a Medicorum temeritate , atque inscitia defensa sit . Nam , sicuti Plinius advertit , *uni Medico hominem occidere impune est* : ut hoc vitarent , recte Aegyptios cavisse , ne Medicis liceret ab Hermetis doctrinis , aliisque remediis , quae , cum usu comprobata fuissent , Aesculapii templo inscripta prostabant , recedere : Empiricae Medicinae satius esse homines credi , quam aliorum commentis : sique Empirica deficiat , naturae potius aegrotos linquendos .

Non ego is sum, qui tanta haec valeam componere; dicam id tutius Aegypto, quam alibi juberi potuisse, quando Aegyptii victo modestissimo utebantur, tum, si Diodoro fides est, quoque mense corpus purgabant; quare morborum natura causaeque simplices, quam alibi, esse debuerunt, ubi vino, ciboque abundantiori, multiplicique, sanitas undique periclitatur (1). Ceterum, si Aegyptiorum severitas displiceat, certe cordatus quisque arbitretur Medici imperitiam poena plectendam esse, quoties medicaminum, quibus usus est, ratio nulla reddi potest. Perbelle quippe Ulpianus ait (2) - *Sicuti Medico imputari eventus mortalitatis non debet, ita quod per imperitiam commisit, praetextu humanae fragilitatis deli-*

(1) Facete quidem, at verè Seneca romanae luxuriae obnoxiorum - *Multos, inquit, morbos multa fercula fecerunt, et simplex morbus ex simplici cibo. Innumerabiles miraris morbos? numera coquos* - His adde Macrob. *Saturn. Lib. 7. Cap. 28.*

(2) *Leg. 6. Dig. de Offic. Praecons.*

*ctum decipientis, in periculo hominis, innoxium esse non debet* - Idem et Francorum moribus servatum esse probat Paponius (1), qui refert Judicio Parisiensi Medicum postulatum fuisse, quod aegrotanti potionem quamdam solito graviolem dederat, atque Judicum sententia, ea quidem vice, absolutum abiisse, sed severiori interminata poena, si eodem medicamine in posterum usus esset. Verum his certe non indigeamus, quoties docti, probique viri modo sacrum hoc in collegium adsciscantur : quod lege primo curandum est. Sed jam ad judicia progrediamur, de quibus ita habet

## TABULA SECUNDA

### I.

NE QUEM, NI SAPIENS, PROBUSQUE FU-  
AT, JUDICEM ELIGITO.

### II.

SERVI, INOPISVE, DOMINUS, ASSIDUUSVE  
JUDEX NEC ESTO.

(1) *Lib. XXIII. Tit. 8. Art. 1.*



III.

JURI DICUNDO XXXVIRI EX PRINCIPIBUS  
URBIBUS CREANTOR.

IV.

SALARIA JUSTA SUNTO : REDDITI JURIS  
MERCES NULLA ESTO.

V.

ORATORES IN JURE ESSE PROHIBENTOR:  
SCRIPTIS CAUSAS CONSCITO.

VI.

PRAETOR VERITATIS FIGURAM COLLO GE-  
STATO , EAQUE VICTOREM DESIGNATO .

Brevis , Hercle , lex , at sapientiae  
plena : Primo namque litigatorum fidu-  
cia , dein veritatis detegendae commodi-  
tas : postremo Sententiae integritas , san-  
ctimoniaque mire curatae sunt . Sane qui  
in jus veniunt Iudicum cupiditates vel  
maxime timent , si hae ob Iudicum  
mores minus verendae sint , impar tamen  
Judicantis conditio molestiam aliquam ju-  
dicio ingerit , quum quis facile contemni

posse arbitretur. Jam vero his terroribus large Aegyptii Cives suos vindicarunt electione Judicum, qui et moribus, et doctrina praestarent, quique omnibus aequos se praeberent: quod ut commodius procederet, rectissime Judices ex universo Imperio creandos jusserunt. Ad hoc, ne muneribus, quae, ut Sacrae docent Literae, etiam *oculos sapientium excœcant, et mutant verba justorum* (1), prohiberentur, divina ferme lex illa jussa est - *Salaria justa sunt: redditi juris merces nulla esto* - qua Iudicum decori, ac litigatorum securitati consultum, quum et illorum indigentia amota, et largitionis studium, quo potens adversarius certare posset injuria, sublatum est.

Præterea Oratorum fallaciae, quae aliquando justitiae fucum facere possunt, sapienter a jure proscriptae sunt. Haud rara enim exempla sunt iniquissimorum judiciorum, quae verborum flumine, vo-

(1) *Deuter. XVI. 19.*

cis, gestusque contentione solertissimi Oratores provocant. Hinc Lycurgus hujusmodi homines e Republica sua extorres fecit: Athenienses perorandi facultatem eisdem ademerunt. Rectius Aegyptii scriptis causas agi jusserunt. Accurata namque negotii cognitione, calliditas quaeque, atque falsitas dicendi celari non potest: tum Judex, instructissimi Oratoris praesentia liberatus, nil, nisi quod justum, injustumve sit noscere curat, sique id obscurius evadat, aliorum etiam prudentum virorum sententiam sciscitari haud impeditur.

Solemnis denique, angustaque forma reddendi juris servatur, qua simul, et sententiam dicentis, et Partium fides magis adstringatur. Conspicuus enim Judicii Princeps, quem nos, romano more, Praetorem appellamus, Veritatis imagine decoratus, hoc uno litigatorum fiduciam sibi comparabat, tum judicii exitum sanctiorem efficiebat. Legitimo enim ritu figuram ei, qui vicisset, admovendo,

significabat non ab hominum mentibus, sed ab veritate, Supremo Numine, sententiam profluxisse; quod religiosissimo in Populo sat erat, ne jus per Judicem laederetur, qui sacrilegio se obstrinxisset, si sacra imagine, non ad jus vindicandum, sed ad injuriam usus esset, neve victus queareretur, qui Numinum voluntati obtemperandum putabat. Ita Aegyptiis judiciorum severitas curata est paucissimis sanctionibus, quae supersunt, adeo ut aliarum, quae perierunt, desiderium augeatur; quum econtra pigeat superfuisse eas, quae XII. Tabulis constitutae sunt de *in Jus vocando*, de *Vindicibus*, *Obvagulatione*, ac (quod horrendum) *Debitorum trans Tiberim venditione*, *sectioneque*, unde perenne romanae feritatis ad posteros testimonium permanavit.

Nunc jus publicum Aegyptiorum adeamus. De civilium Potestatum ordine, rerumque publicarum partitione, ceteris prolixior habet haec

( 49 )

TABULA TERTIA

I.

LEGE NIL MAJUS ESTO.

I I.

GENERI GRATIA NULLA HABETOR: VIRTUTE  
QUISQUE CONTENDITO.

I I I.

PENES REGEM SUMMA POTESTAS ESTO.

I V.

SECUNDUM HUNC SACERDOTES: TERTIO  
MILITES SUNTO.

V.

REX LEGI OBTEMPERATO: EIQUE NAVI  
MAGISTRI, AULICIQUE ADSCISCUNTUR.

V I.

HUNC SACERDOS QUAEQUE LUCE MONETO:  
BENEFACIA VIRORUM LAUDATO, MALE-  
FACTA VITUPERATO.

V I I.

STUDIA, VICTUS, SOLATIA REGI JUSSA  
SUNTO.

( 50 )

VIII.

HAEC SI NEGLIGET, POSTHUMIS TENETOR.

IX.

SACERDOTES REGEM IN REPUBLICA GERENDA CONSILIO JUVANTO.

X.

RELIGIONIS, SCIENTIARUMQUE LIBROS CUSTODIUNTO: HIS REMP. MODERANTOR.

XI.

MODIS, PONDERIBUS, A. A. A. F. F. NE-  
XUIQUE PRÆFICIUNTOR.

XII.

VECTIGALIBUS IMMUNES SUNTO.

XIII.

MILITIBUS JUGERA XII. TRIBUTIS IMMUNIA RELINQUUNTOR: PANIS LIBRAS V. CAR-  
NIS LIBRAS II., VINIQUE SEXTARIUM SINGULIS IN DIES DATO.

XIV.

PACE, CORPORE EXERCENTOR.

( 51 )

XV.

RELIQUI VEL PECORA, VEL AGROS, ARTESVE CURANTO.

XVI.

QUISQUE CENSU NOMEN, VITAE RATIONEM, BONA PROFITETOR. INFICIATOR, TURPISVE QUAESTUS CONFESSUS, CAPITAL ESTO.

XVII.

PROLETARIO DEDECUS ESTO.

XVIII.

NE QUIS DE CONDITIONE, QUAE EI SIET, QUIDQUAM MUTATO.

XIX.

PATER FILIO ARTEM SUAM PERPETUO TRADITO.

XX.

UTI NILUS ASSURGAT PUBLICUS MODUS METITOR.

XXI.

FLUMINE REDUCTO, INUNDATIONIS MODUM PROVINCIIS MANIFESTATO.

REGNI FRUCTUS TRIFARIAM HERSCISCITOR: PARS REGI: ALTERA SACERDOTIBUS: QUAE SUPEREST MILITIBUS ADDICITOR.

Principio Aegyptii aequissimi, nec non firmissimi Imperii fundamenta jecerunt, legem, atque honestatem. Huic merendi, illi imperandi vis attributa. Generis gratia sapienter amota; quemquam enim propria, non Majorum virtute niti decet, quin immo sollicite curandum est ne ingeneratae virtutis opinione flagitiosus quisquam ad injuriam, socordiamve utatur. Idem curarunt Sinae apud quos avitus honos ignotus. Haec dum audio videtur jam mihi illa usque in terris frustra expetita Civitas Platonica adumbrari, qua unum legis, id est, rationis imperium statuitur. Quid enim aliud lex est, docente Tullio (1), quam - *Naturae vis, mens ratioque Prudentis, juris, atque injuriae*

(1) *De Legibus lib. I.*



*regula?* - Quae quidem ratio , semel in homine confirmata , et perfecta , ne pravarum cupiditatum aestu concideret, ideo pacatae Legis auctoritati concredita est. Hinc veritatis , sapientiaeque certissimum testimonium hujusmodi apte a Demosthene dictum accepimus *εὐρημα , καὶ δόρον Τῆς* - inventum ac munus Dei.

Sed summa Civitatis potestas , unde leges in bonum universorum descendant , in unum collata est, qui Rex dictus. Verum, ne is longissimo intervallo a Plebe distaret , huic statim Sacerdotes , tertio Milites adjecti sunt, qui honoris praerogativa donati , nimium Regni splendorem temperabant , molliterque in reliquos Principis auctoritatem demittebant. Praeterea Legis imperio Rex primo adstrictus, atque ita temperata, commodiorque Reipublicae species statuta est ; nulla namque regiminis forma aptior dari potest , quam unius dominatus , ubi legibus famuletur , quibus si omnino solutus sit is , qui rerum summa potitur , facile si

quando mala cupiditas flagret , potentiae suae limites excedat , ultra quos semel progressus , de uno in alterum prolapsus malum , aliorum bona , vitam pravae lubricidini immolabit . Quae pestilentissima exempla imitati Cives , legum auctoritate despecta , ut Tyramno blandiantur Reip. statum concutant , atque pessumdent ; praeclare enim docuit Tullius (1).  
*- quaecumque mutatio morum in Principibus extitisset , eandem in Populo secuturam -*

Haec antea senserat Plato (2) , qui interitum ei Reipublicae praedicebat , ubi non lex Principi , aut Magistratui praecesset : salutem vero illi , ubi lex , servientibus Magistratibus , dominaretur . Chrisippus , Pindarusque eadem secuti , legem omnium ducem , mortalium , atque Immortalium Reginam magnifice praedicabant . Tandem Augusti per-

(1) *De Legibus lib. II.*

(2) *De Republica lib. IV.*

belle in *Lege 3. Cod. de Leg.* legis prae-  
stantiam ita extulere - *Digna vox est*  
( inquam ) *majestate Regnantis legibus*  
*alligatum se Principem fateri, adeo de*  
*auctoritate juris nostra pendet auctori-*  
*tas, et revera majus imperio est legi-*  
*bus submittere Principatum* - Neque ip-  
sum Principem expedit, legum vincu-  
la, nisi aliter publica salus flagitet, quae  
suprema lex est in Civitate, excutere;  
quum illud inter omnes constet Tyram-  
nidem eisdem artibus, quibus usurpa-  
ta primum fuit, interire: rectissimeque  
Spartanum Theopompum feminae objur-  
ganti, quod regiam, quam tenebat, pote-  
statem attenuasset, objecto Ephorum  
imperio, liberis suis imminutam auctori-  
tatem relicturus, respondisse - *imminutam*  
*quidem, sed hoc ipso diuturniorem* - Quid-  
quid enim dominatui detractum erat,  
securitati Regnantis adjectum probe in-  
tellexit.

Severa hujusmodi in Rege statuta  
prudenter Aegyptii suspicati sunt facile

contemptum iri , nisi moribus supremi Dominantis sustinerentur ; quare Principis institutioni lege consulendum duxerunt adlectione Familiarium , qui spectata fide , atque honestate ceteros antecirent . Recte enim Plato Persici Imperii ruinam mulieribus adscribit , atque Eunuchis , qui Cambysen a puero , dum Cyrus bello procul detineretur , assentatione , pravisque consiliis , non ad prudentiam , sed ad amentiam , injuriamque informabant . Animis quippe tenduntur insidiae , vel maxime a Nutricibus , et Magistris , qui teneros , et rudes cum nos acceperint , inficiunt , et flectunt , ut volunt . Proba autem praecepta semel imbuta , ne animo postea exciderent , Sacerdotes curabant augusta quotidiana oratione , qua Regi apte virtutis , ac vitiorum exempla conspicienda proponebant , ut ab his se temperaret , alteram vero amplecteretur . Postremo , ne quid Princeps nimio studio sequeretur , eique dum totus incumberet , reliqua omitteret , est

lex quae regia studia victum, solatia moderatur. Intemperantiae enim tristiores exitus veriti sunt in eo, qui majori ope donatus esset ad libidines suas explendas: tum sacratissimae Regis vitae prospexerunt. Intemperantia siquidem, uti monet Tullius, - *corpus frangit, mentem deprimit, mortemque accelerat*. Reque vera ita his sanctionibus valetudinis cura emicuit, ut hae non a Legumlatore, sed a Medico peritissimo statutae viderentur.

His tamen officiis, quae legibus ingerebantur, si Princeps satis non fecisset, eum dum vita manebat, impunitum linquendum Aegyptii existimarunt. Absurdum enim eisdem videbatur, de eo iudicium capi, penes quem summa erat Imperii potestas: quod a gravissimo Doctore animadversum est, qui docet interna modo, hoc est *conscientiae*, non externa, seu *coactiva* vi Regem teneri (1): tum aleae, periculique plenum opus Prin-

(1) S. Thomas q. 96. art. 5. p. 1.

cipem ad iudicium accire , quod rei dignitas , majestasque invidiosum partium vero studia cruentum reddere poterant . At vero cum Princeps vita decessisset , tum , cupiditate quaque seposita , de ejus vita gravius , tutiusque inquirendum duxerunt: quod postea videbimus , quum de religiosis erit sermo . Nunc tamen Aegyptiorum sapientiam liceat nos admirari , qua , et Regni majestati , et civium saluti apte consultum fuit ; quando veteres , etsi injusti , famam tamen , funerisque honores vita ipsa cariores habebant , quibus ne carerent , quum honestatis simulatione , et potentia malefacta sua celare non possent , firmiter in officio , dum in humanis erant , continebantur .

Sacerdotum munia gravissima tum jura lege ita statuuntur , ut Religionis honores , Regni auctoritas , publica felicitas ex eis hauriantur . Quod enim Regem consilio juvent , id summam potestatem , unde cuncta in Civitate dimanant , instructiorem reddit , atque sanctiorem . Re-

cte apud hos sacri libri relinquuntur , quibus contra Regis temeritatem utantur , qui a Sacerdotum sententia recedens , Populi fidem servare non posset , his vero conjunctus , non humana modo , sed et divina auctoritate jussa sua muniet. Deinde Sacerdotum auctoritas modis , ponderibus , auro , argento , aere flando , feriundo , contractibusque praefecta , hominum commercia , sine quibus vita commode agitari non potest , divina sanctione undique a dolis , fraudibusque defendit . Postremo Religionis honos merito extollitur vectigalium immunitate , qua Sacerdotes donantur , qui sacris operati , hoc ipso in Reipublicae bonum maximum quid conferre consentur : quod multo , Hercle , aequius , altioribus e principiis haustum , nostri Pontifices vera in Religione sanxerunt (1).

(1) *Cap. 4. 6. de Imm. Ecl. Cap. 1. 3. 4. cod. in 6.*

Militum tertio succedit cura, qui pacifica etiam in Civitate praetereundi non sunt; arma siquidem eo paranda sunt, ut, sine injuria, in pace vivatur. Displiceat fortasse quibusdam perpetuas militias de publico sustentatas fuisse, etiam quum nulla belli necessitas urgeret: rectius, dicant, Romanos legionariis militibus usos fuisse, quos bellum cogeret, pax dissolveret. Verum isti non bene Democratiae leges Monarchiae attemperabunt, tum belligerae, atque pacatae Reipublicae regulas componant. Sane Aegypto militaris vis tantum ad injurias arcendas parabatur: Imperii felicitas, non in belli gloria, sed in rerum copia, commerciorum, artiumque facilitate, ac perfectione ponebatur. Haec ut assequi possent, oportebat quemquam in Civitate peculiari instituto inservire, nec mercatores, artificesque bello erant impediendi. Artes enim hujusmodi inter armorum strepitum penitus jacere ipsa romana Respublica edocuit, quae, summum militaris gloriae



fastigium adepta, artibus a victis populis informari debuit. Ceterum Aegyptii, ne milites hujusmodi Civitati incommodo essent, sat providerunt lege, qua, pacis tempore, milites corpore exerceri jussurunt.

E reliquo autem populo sapienter lex petit Imperii divitias, quum ceteros cives vel agrorum, vel pecorum procurationi, vel artibus adscribit, atque ita publicae, privataeque opulentiae fontes reserat, augetque. En insuper Rempublicam a faece hominum purgatam, quae segnitie, atque egestate, novis rebus confusa turbas undique ciere non desinat. Nemo Aegypto proletarius, miser, quando iners, ségnis nemo esse poterat ex Civitatis lege. Quisque utili rei operatus, in Censum nomen, vitae rationem, bona profiteri tenebatur, ut Civitati privatorum opes innotescerent, atque inde justus tributa imponendi modus haberetur. Praeterea illud etiam cautum est, ne quis a vitae instituto, cui se semel addixerat unquam discederet, adeo

ut vitae ratio a patre electa in filios perpetuo transiret. Artium perfectioni consuluisse censuit Amasis Rex, qui tamen haud sensit ingenia non item ac bona a patre in liberos transferri, nec omnes aequae in eadem studia, artesque rapi, verum in his totam dominari naturam, cui lege resistendum non est. Hoc probe tenens Solon liberam artis electionem Atheniensibus reliquit. Providae, improvidaeque legis exitus cernimus posteri in Aegyptiarum, Graecarumque artium monumentis, quae supersunt, dum illa, perpetuis regulis mancipata, stupidas, inanimas, uniformesque rerum facies exhibent: haec vero, libero ingenio juvata, venustum, spirantem, multiplicemque Naturae aspectum referunt, aemulantur.

Est lex de Nili effusione metienda. Haec probe intelligatur quum notum sit Aegypti feracitatem ex Nili inundationibus manare. Felix quippe Aegypti regio rarissime in bribus contristatur, pro his, beneficentissimae Naturae opus, Nilus, qui

Abyssinorum plaga exortus, Aethiopes, atque Aegyptum peragratus, septemplici ore in Mediterraneum procurrit, ordinaria inundatione quotannis terram foecundat; recedens quippe fluvius mollitos, atque oblimatos agros ad serendum relinquit, unde eleganter canit Tibullus (1) -

Quid referam . . . . .

Qualis, et arentes cum findit Syrius agros,

Fertilis aestiva Nilus abundet aqua?

Te propter nullos tellus tua postulat imbres,

Arida nec pluvio supplicat herba Jovi.

Jamvero Agricolae longo usu comperire messis ubertatem ab vario inundationis modo pendere. Hinc regio sumptu Memphi prostabat columna, quae varias fluminis excursions designabat. Modum hunc lex jubet Provinciis manifestari, ut inde quantus ex terra fructus quoque anno esse possit antea innotescat, atque ita quisque rem familiarem consultius mode-

(1) *Elegor. lib. I. Eleg. 6.*

retur: Respublica vero ex Gensu, futuraeque messis mensura quantum rerum, vel ab exteris comparare, vel e Regno mittere expediret providebat. Quod eximiam praesefert publicam curam, ne cives annonae caritate inconsulto laborent, neve copia obruantur: utrumque quippe commercio exitiale oeconomiae publicae Scriptores merito duxerunt (1).

Postrema lex publica bona in usus publicos modo dispertitur, nempe Regi, Sacerdotibus, et Militibus. Recte enim qui se totos Reipublicae dabant, ex publica re alendos existimarunt. Reliqui ex industria victum quaerebant. Aegypti Regnum amplam veluti familiam, prudentissime moderatam, conspiciendum sese praebebat. Verum haec bona maxima tutata sunt severiori Criminali disciplina de qua statuit

(1) Confer Genovesi *Lez. di Com. Part. I. cap. 18. §. 8.*

( 65 )

## TABULA QUARTA

I.

SI QUI PEJERASSIT , CAPITAL ESTO.

II.

SI QUI LIBERAM SOLUTAM VIOLARIT , FLA-  
GITIUM TESTIBUS EXSECTIS LUITO.

III.

MOECUS MOLLE PLAGIS CAEDITOR.

IV.

PELLEX NARIBUS MULCTATOR.

V.

ALEATOREM AD LATOMIAS DAMNATO .  
CUIVIS E POPULO ALEATORES ACCUSARE  
FAS ESTO.

VI.

SI QUI PERDUELLI REIPUBLICAE ARCANA  
MANIFESTARIT , LINGUAM AMITTITO.

VII.

MILITIAE DESERTORI INFAMIA ESTO.

( 66 )

VIII.

FORTI SANATI SIREMPS JUS ESTO.

IX.

EI QUI FALSUM IN NUMMIS, TABULISVE  
PATRARIT, UTRAQUE MANUS EXCINDITOR.

X.

SI QUI HOMINEM LIBERUM DOLO MALO  
MORTI DUERIT, DARIVE PRUDENS SIRIT,  
PARRICIDA ESTO.

XI.

URBS QUAEQUE CIVIUM VITAE CONSULI-  
TO: SIQUE HOMO VI MORTUUS EJUS AGRO  
INVENTUS SIET, URBIS SUMPTU CADAVER  
INUNGITO.

XII.

KALUMNIATORIBUS TALIO ESTO.

XIII.

QUI PARENTEM NECASSIT, CALAMIS CON-  
FIXUM, RUBISQUE INVOLUTUM IN IGNEM  
CONJICITO.

Superiori Tabula, quam hactenus ex-  
planavimus; publica felicitas satis instru-

cta fuit : nunc eadem firmitus munienda, simulque a morbis civile corpus praeservandum, vel saltem curandum est per poenas, quas morborum civilium, criminum nempe, remedia apte dixerunt Philosophi. His profecto non indigeat Respublica, qua, uti lex civitatem, ita singulos ratio moderetur. Verum ex animo, et corpore constans homo haud semper ita se contineat, ut *ratio praesit, appetitus obtemperet*, ceu monet Tullius *de Officiis*. Impotenti Naturae impetu homo in laetiozem, beatiozemque rapitur fortunam. Voluptate, doloreve, trahitur, repellitur : spe, metu, exultat, concidit : felicitati, id est honorum naturae convenientium complemento totus studet. Hanc dum anxie persequitur, innocue quidem, quando natura, saepe eum sensuum vis transversum agit, rationis injuria. Hinc pugnantia, absurda, pravaque in Societatem erumpunt.

Praestans rationis vis homines a Naturae statu in civiles societates coegit, quo

ab injuriis securiores viverent, vitaeque commodis aptius fruerentur. Eadem docuit sine imperio, et legibus, quae civibus indigarent ea, quae facienda, omittenda-ve essent, ut publicum bonum assequeretur, nullam Civitatem consistere posse. Qui autem imperium, leges esse poterant, nisi homines inter se convenissent, voluntates suas summae alicui Potestati subicere, quae cuncta pro civium bono juberet: ceteri supremis jussis obtemperarent, publicum bonum privato semper praelati? Haec fuere Civitatum initio: inde securitas, felicitasque gentibus quaesitae. Attamen, et Civitate composita, sensuum vis mortales exagitare non desit. Hinc ubi quid, specie magis, quam re, optabilius, sensusque proxime pertingens bonum emergit, cui lex impedimento sit, statim in homine cupiditas micat illum assequendi, praestantiori quovis publico, sensuque remoto, bono seposito. Quem itaque rationis, conscientiaeque vox satis non moverat, sensibili, necessariaque vi,



dolore nempe , atque afflictione a maleficio dehortari oportuit : quod per poenas consultissime effectum est . Afflicto enim , cruciando , poenarum vis exseritur . Aliter sane cogitare , judicare , homines possunt : aliter vero ac sentiunt , sentire non possunt . Libertas in animo , motuum necessitas in corpore dominatur . Crimini- bus itaque satis occursum erit , si homines probe noscant , plus ex maleficio doloris , quam voluptatis habituros ; tunc enim et rationis , et sensuum vis quemquam in officio continebit . Quod si poenae evadendae spes , improbitasve effera crimen impedire haud valeant , santis supplicium asperitate sua noxium fortasse aliquando corrigat , ceteros vero ab imitando avertat . Prima sancienti , altera exequendi poenas causa extitit . Ceterum ex publica utilitate jus hoc inter homines ortum spectandum : hinc fons , modusque poenarum hauriendus (1) .

(1) Praeclare Tullius de Offic. lib. 1. - *Omnis*

Pauca haec de poenis attigimus, unde facile cetera deducantur. De delictis, ut sese res offerat, jam dicemus, criminalem Aegyptiorum disciplinam persecuti. Crimen utique mala res, Societatis bono perpetuo inimica, poenaeque coercenda; verum non omnia crimina eodem loco habenda. Sunt quippe quae plus, quae minus malitiae, damnique socialis secumferunt. Irridendi autem Stoici, qui omnia peccata paria reputabant - *Nec enim vincet ratio hoc, tantumdem ut peccet, idemque, qui teneros caules alieni fregerit horti, et qui nocturnus Divum sacra legerit.* - Salse more suo Horatius (1). Delictorum itaque plures gradus statuendi. Nos genus omne criminum, quae poenis mulctata apud Aegyptios accepimus, ita dispertiti sumus, ut primo quae Religio-

*autem (inquit) animadversio, et castigatio contumelia vacare debet, neque ad ejus, qui punit aliquem, aut verbis castigat, sed ad Reipublicae utilitatem referri.* -

(1) *Satyrar. lib. I. Sat. III.*

*nem* : deinde *quae bonos mores* : praeterea *quae publicam salutem* : postremo *quae singulos laederent* primario, traderentur.

A Delictis , quae Religionem violant  
Tabulam hanc auspicati sumus , quando  
pollutae Religionis crimen, omnium fac-  
dissimum est . Profecto si par nequitiae  
poena sumenda esset , nullam in huma-  
nis idoneam adinveniri datum esset. Sed  
non bene de interno malo in Civili So-  
cietate disputabimus, cui unum sociale  
damnum avertere per poenas propositum  
est . Impios itaque internae pravitatis suae  
condigna poena maneat per summum Na-  
turae artificem Deum, qui humanae men-  
tis latebras permeatus , noxam apte pre-  
hendere , tum divina vi severius plectere  
valeat . Nos hoc crimine , ethnica prae-  
sertim in gente, Societatis injuriam unam  
sectabimur . Quam quidem exstare maxi-  
mam quis neget ? Religionem siquidem  
firmissimum humanae Societatis esse vin-  
culum quis non videat ? quid enim ad  
hominum superbiam, contumeliam, indi-

gnationem compescendas aptius? quid ad animorum conjunctionem fovendam, socialesque virtutes omnes excitandas accommodatius Religione dari potest? Hoc gentes ferme omnes, licet inepta superstitione inquinatae, intellexerunt, quum harum nemo Religione carere potuit - *Si terras obeas ( inquit Plutarchus ) invenire possis urbes muris, literis, Regibus, domibus, opibus, numismate carentes: urbem templis, Diisque carentem nemo uspiam vidit.* Praeclare enim Tullius - *haud scio (ait) an pietate adversus Deos sublata, fides etiam, et Societas humani generis, et una excellentissima virtus, justitia tollatur.* Ubi ergo humana quaedam societas, ibi Religio aliqua necessaria omnino est.

Sed hoc delictorum genere, quod socialem spectat injuriam, excellet Perjurium, quo in dictorum, promissorumve testes Superos, fallendi animo, adsciscuntur, quod Aegyptiorum lege capite expiatum est. Summa profecto Jurisjurandi religio esse debet inter homines, quando nullum

ad adstrigendam fidem arctius vinculum dari potest. Quis enim non intelligit, dicam cum Tullio (1), *quam sancta sit societas civium inter ipsos, Diis Immortalibus interpositis, tum iudicibus, tum testibus?* Qui autem fidem violat justitiam omnem pessumdat, cujus fundamentum est fides (2). Quod probe sensit Numa, cujus lege praecclare sancitum est - *Ut omnes Fidei Numen metuerent* - (3). Hinc gentes omnes perjuros execratae sunt. De Romanis hanc legem tradit Cicero de Legibus - *Perjurii poena divina exitium: humana dedecus esto* - quam legem tamen e XII. Tabulis, vel e romanis potius moribus Tullius confinxerit, disputant Eruditi (4). Verum Aegypto poena aliquanto asperior

(1) Tullius *De Legib. lib. I.*

(2) Id. *de Offic. lib. I.*

(3) Dionysius Halicarn. *lib. II.*

(4) Confer Gravinam *Orig. Jur. lib. II. cap. 46.*  
ibique *Mascovium*.

flagitium hoc insectatur, quando summus ibi Religionis honos, qua suprema potestas, vitaeque commercia undique munita sunt. Ad hoc, civium fortunae perjurio labefacta ri poterant, quod ex Tabula I. noscendum. Poenarum vero modum e loci maxime, aliisque Reipublicae opportunitatibus pendere quisque videat, quum noscat utilitatem publicam uniuscujusque gentis propriam esse: hinc autem poenas derivandas jam diximus (1).

Religionis injurias proxime sequuntur injuriae bonorum morum, quos publicae tranquillitatis, felicitatisque artifices apte dixeris. *Quid* enim, perbelle Horatius, *leges sine moribus vanae proficiunt?* Nec Philosophi, immo nec hominis nomen merentur ii, qui civium mores, maxime

(1) *Evenit ut eadem scelera in quibusdam Provinciis gravius plectantur: ut in Africa messium incensores: in Mysia vitium: ubi metalla sunt, adulteratores monetae* Saturninus ait in *Leg. 16. Dig. de poenis*. Peculiariora haec sunt, at ratio latius pateat, quum legis vim potestatemque teneris.

qui ad intemperantiam voluptatum pertinerent, nil Civitatis bono conducere scriptis mandare haud erubuerunt. Sat est tristissimos vitiorum exitus expendere, ut pateat quantum ii misere desipiant. Non hic cuncta vitiorum genera sequamur, quod longum esset, tum ab instituto nostro alienum, qui Aegyptiorum leges illustramus, nec Polithices libros conscribimus. Paucis tamen rem omnem conficimus, generali virtutis notione proposita. Haec, nominis potestate sua, est quaedam vis perficiens quod naturae cujusvis est. Alia hinc aliis naturis, agendique proprietatibus existat oportet. Hoc sequimur vulgari in sermone, quum herbarum, puta, mineralium, animalium virtutem dicimus, quo nil aliud intelligimus, quam rerum praestantiam ad aliquid efficiendum natura. Quamobrem aptissime dixit Tullius de Legibus - *Est virtus nihil aliud quam in se perfecta, et ad summum perducta natura* - .

Jam vero vitae commoda, ac felicitatem a Natura derivandam esse quis neget? Summus enim hujus artifex Deus ita eam instruxit, ut per se humano generi cuncta, quae ei prodesse possent, afferret. Perbelle hoc sensit idem Tullius, quum de Naturae praestantia pulcherrima haec habuit loco mox laudato - *Itaque ad hominum commoditates, et usus tantam rerum ubertatem natura largita est, ut ea, quae gignuntur, donata consulto nobis, non fortuito nata videantur: nec solum ea, quae frugibus, atque baccis, terrae foetu, profunduntur, sed etiam pecudes: quod perspicuum sit, partim ad usus hominum, partim ad fructum, partim ad vescendum procreatas. Artes vero innumerae repertae sunt docente natura, quam imitata ratio res ad vilam necessarias solerter consecuta est. Ipsum autem hominem eadem natura, non solum celeritate mentis ornavit, sed etiam sensus, tamquam satellites, attibuit, ac nuntios, et rerum plurimarum obscuras, et*



*necessarias intelligentias enudavit , quasi fundamenta quaedam scientiae.* Haec Tullius, rudi adhuc Methaphisica, vidit, quid nos , quibus compertum est, tribus praesertim actionibus humanam naturam prodi , *cogitatione , appetitu ; et motu ?* quarum primae animi , postrema corporis est . Quaelibet autem vis in finem suum tendit natura . *Verum* intellectui : *bonum* voluntati : *sensationum nuncium, animique ministerium* motui propositum est . Vis unamquamque ex his facultatibus perficiens virtus est, quae ex objecti, quod perficit varietate , *vel intellectualis, vel moralis, vel mechanica* nuncupatur, prout nempe, vel intellectum , vel appetitum , vel motum perficiendum susceperit . Quod autem praeclara haec naturae munera deserit, pervertit , vitium est .

Circumspiciamus jam celeriter animo quantum boni ex triplici virtutum , quas posuimus, genere in societatem dimanet . Ut quis intellectum perficiendum curet , hac rerum universitate positus, verum a

falso, aequum ad iniquo valeat secernere. Inde quae Deo, quae sibi, quae aliis officia reddenda sint probe distinguat. Praeterea se ad Societatem cum aliis in- undam, fovendamque natum esse deprehendat: hinc veritates illas evolvat, unde maximam in alios conferri utilitatem sentiat: naturalibus denique facultatibus eo utendum, ut inde Dei honos, hominumque felicitas emergant: segnitiam vero morte pejus fugiendam apprime teneat. Quos vero ita intellectus irradiet, proxime voluntas in honestiora quaeque studia impellat, tum a deterrimis, societati- que maxime molestis flagitiis avocet. Tan- dem mechanica virtus corporis robori, dexteritaeque consulta, primum sincerio- res rerum impressiones intelligentiae prae- stabit, deinde quod perbelle intellectus vidit, concupivit voluntas, celeriter, ap- tissimeque in usus hominum deducat.

Praeterea natura artifex Deus summa providentia ingenia ita dispertitus est, ne quid societati humanae necessarium, et

utile cultore suo careat. Fortunata itaque in Republica, quam fingimus, quisque naturae suae vires primum tentatus, mira alacritate ad ea studia convolabit, quibus se aptiorem conformatum esse sentiat. Hinc alios videas dies noctesque severioribus disciplinis incumbentes, quibus Divina natura digne pernoscatur, societatisque humanae regendae ratio enucleatius tradatur. Alios naturalium rerum cura usque divexet, ut inde quid in hominum utilitatem redundet. Nonnullos corporis vigor, animique ardor sagacitate conjunctus in castra propellant. Multos terrae cultus, mercatura, artes trahant. Haec autem sapientiorum hominum doctrina antea illustrata, validioribus dein, aptioribusque viribus exulta copiam undique in populum diffundant. Hinc sana Religio, aequum Imperium, publica tutela, civium institutio ac felicitas oriantur. O praeclaram virtutum morumque vim! utinam vitiorum laqueis numquam detinereris! tunc civitas quaeque bonis omnibus affluens, spirans quae-

dam Divinae bonitatis imago exstaret, quae tanta in hominum usus, ac commoditates munera largita est. Quae quidem bona maxima frustra a lege una expectes, quando a lege sat habeas (nec semper datur: supplicium enim, etsi asperius, longe tamen est, delicti autem dulcedo praesens): si cives se abstineant a crimine, terrore poenae; ut autem naturae opes in Civitatis bonum intendantur, id totum virtutum, bonorumque morum est, quos vitia misere dilacerant. Quamobrem impie non minus, quam stulte illi scriptum liquere nil morum, virtutumque societati civili necessarium, aut utile exstiturum. Pudeat eos, Ethnicum hominem, Tullium dico, meliora de hac re sensisse, quum legem voluit - *vitiorum emendatricem, commendatricemque virtutum* (1); praeclare quippe eidem suum erat, utile ab honesto natura discrepare non posse (2). Sed ad Aegyptios redeamus.

(1) *De legibus lib. 1.*

(2) *De Officiis lib. I.*

Crimina quae venerea lubricine excitantur acriter lex persequitur , quando nulla proclivior sceleribus omnibus occasio dari potest ea, quae ex impudico, eodemque vehementissimo amoris aestu gignitur. Sed faedorum hujusmodi genere excellet adulterium , quo conjugis fides sanctissima temeratur impure , alienaque proles obtruditur alteri alenda: Conjugum animi , quos in bonum prolis conspirantes esse decet, tristissime avertuntur. Neglecta autem puerorum disciplina , mali cives irruunt in societatem. Praeterea conjux conjugem perosus , ejus vitae insidiatur, Pellicis , Amasiive actus incitamentis : hinc suspiciones , rixae , caedes familiarum , quibus omnibus ita perturbatis , publicus quoque ordo concutitur , concidit .

Quamobrem impurissima in haec severius Aegyptii animadverterunt ; at forsitan minus considerate . Quod enim stupri poenam attinet , inhumanum quid , quo societatis membra mutilentur , jusserunt ,

nec noxae injuriam repararunt, Satiùs lex Antica nuptiis, vel corruptoris morte stuprum expiandum jussit (1): leniorque Mosaica lex dotem, et nuptias a stupratore praestandas injunxit (2): cui convenit Canonica sanctio (3); licet, mitiori Fori usu; copulativa hujusmodi in disjunctivam, ut inquit, versa sit (4). Quod adulterium spectat, in mare saevitas non necessaria adhibita, quando mors una satis acerbitalis habet, quum primum hominum appetitum, vitam, destruat, quin ei cruciatus quoque atrocissimi addendi sint: mulier vero ita facie faedata ubique ignominiam suam praeseferat, quae num-

(1) Scholiastes Terentianus in *Andriae* vers. 41. 42. *Act. IV. Sc. 3.* - *Lex erat*, inquit (Athenis) *Ἡ Βίασδεῖσα ἢ γάμον, ἢ θάνατον αἰρεῖσθω του Βιασομένου*: scilicet; vim passa vel nuptias, vel mortem corruptoris assequitor.

(2) *Deuteron. XXII. 29. Exodi XXII. 26.*

(3) *Cap. 1. de Adult. et stupr.*

(4) Vid. Fagnanum in *Cap. 2. de Adulter. et stupr. n. 2. et 3.* Moschat. *Inst. Can. Lib. 5. tit. 16. n. 12.*

quam animum ad honestiora, tanta abiectione, valeat excitare. In poenis autem, quae vitam non adimunt, sontis correctio, emendatioque negligenda non est.

Sed fortasse erunt, qui ex poenae atrocitate perbelle Rempublicam a criminibus servatam dicant. Sententiam hanc sequitur vir praestantissimus, at romanae Reipublicae plus aequo admirator, Vincentius Gravina, quum dirissimum XII. Tabularum de sectione Debitorum jus, crudele *in speciem* exemplum appellat. *In speciem inquam* ( sic ipse (1) ); *nam revera nil mitius ea poena, quae terrore suo delinquendi consilium aufert* - Praeclarum oppido criminalis disciplinae studium delicta impedire. Huc si atrociores Draconis, Charondae, Saleucique leges spectarunt, consilio quidem laudandae sunt; verum ne populum turbarint potius, quam composuerint timeo. Crudelius quodque supplicii genus excogita, numquam deli-

(1) *Orig. Jur. Lib. II. Cap. 72,*

cta ab hominum societate delere poteris. Crimine itaque patrato, immanis poena, vel exigetur, vel erit ludibrio. Si prius contingat, supplicii feritate civium corda, humanitate ita per lege abjecta, crudelitati assuescant, qua atrocius nihil moliri non audeant. Quos vero ferocia poenae ab mitioribus moribus non abduxerit, in supremam potestatem, unde faedissima haec descendunt, impellat: rei infelicitatem miserti immmane jugum excutere studebunt. Sin alterum eveniat: quod frequentius, quando natura ipsa ab feritate abstrahit, quum nulla flagrans cupiditas animum exagitat: hinc delictorum quaesitores ipsi nolint in crimine reperire, quos nolint inique plectere: ciyes autem fugae, occultationi sontis faveant impense: tunc, legum vi semel despecta, improbi in crimina ovantes incedant. Utroque itaque eventu publicam salutem evertas, quam contra, humaniori, criminique adaequata poena, praeclare incolumem servabis, quum cun-



et i legis executores sese libenter praebeant, nullaque impunitatis tristissima via improbis pateat.

At jam delictorum genus complet Alea, *legibus vetita*, ceu coecinit Horatius (1). Revera interest Reipublicae, ne quis re sua male utatur. Quid autem perversius, quam fortunas tuas, quibus vel familiam, vel alios tueri possis, aleae committere? Sed praeter haec prodigalitatis mala plurima aleae insunt vitia, quae Legumlatoris sollicitudinem excitare debeant. Nulla namque faedior lues aleatoria cupiditate dari potest turbis, rapinis, caedibus gignendis, ubi animum invaserit. Haec domesticos hominum coetus in hostiles concursus pervertit. Citius sanguinem, vitam, quam vincendi spem, deserat aleator: hinc, perditam re, nova usque e familia tollere, rapere, alios spoliare, interficere, quo iterum ludendi copia sit, properabit. Qua-

(1) *Carminum lib. 3. Od. 26. v. 58.*

mobrem penes Romanos aleatorum genus infame habitum est, a dicendo testimonio quandoque prohibitum, eorumque domus publica tutela contra fures, raptoresque destituta, immo et ipsa publicata: aliaque in invisos hujusmodi statuta (1). Aegyptii vero, altius rem perscrutati, publicam accusationem in aleatores jusserunt, criminisque convictos ad latomias damnarunt: quod supplicii genus Romae tantum eos, qui alterum ludere compulissent manebat (2).

Publicae felicitatis fundamentis jactis, Religione, ac bonis moribus, nunc universorum salus defenditur, poenis in Reipublicae proditores, militiae desertores, ac falsarios statutis. Laesae Majestatis crimen praecipue occurrit, quod principem in Civili societate nequitiae locum tenet. Eo namque aggreditur suprema

(1) Vid. Dig. et Cod. *tit. de Aleatoribus*, Marquardum, Freherum *Cap. 22. n. 5.* Ranchbarum *p. 2. Q. 25. n. 31.*

(2) *Leg. 2. Digestor. tit. de Aleatoribus.*

Potestas, qua cives omnes defensi sunt ab injuriis, et ex qua maximum civilis coalitionis bonum oritur. Laesa itaque in Majestate supremi Regiminis cives omnes laesosprehendas (1). Quod luctuosa licet nimis experientia docuit, quam, hostiliter summa potestate aggressa, egestate, caedibus civitates, patriique Lares faedati sunt. Tristioris criminis plures sunt species, quas expendunt Jurisconsulti (2): lex vero, quam invenimus, tantum eos, qui arcana Reipublicae hostibus manifestarint, persequitur linguae sectione, quasi aliter idem in posterum patrari non possit. Nec felicius Aegyptii publicam tutelam curarunt infamia, quae una militiae desertorem manet. Vix enim honoris, gloriae capax erit, qui vitam Reipublicae saluti anteponendam duxerit. Dedecus vero ei, qui honore non capitur, non grave: hunc,

(1) Bour lamach. *Du Droit Politiq. Par. I. c. 3.*

(2) Vid. Digest. *Lib. 48. tit. 4.*

nisi mors a lege sancita, nil aliud in statione continebit. Congrua tamen, quae sequitur, sanctio est, qua venia, honos ei, qui in castra redierit, ac si nunquam discesserit, redditur, quod nos ex XII. Tabularum voce expressimus - *Forti saneli siremps jus esto* - Nec enim ad gloriam reverti quisquam impediendus est.

Postremo Falsi teterrimum crimen, manibus incisis, plectitur. Sed probe discernendum erat *nummarium falsum* a *testamentario*, quo et aliarum tabularum adulteratio continetur. Prius enim altero longe nocentius, flagitiosiusque habetur. Eo namque supremæ Potestatis jus læditur, cui uni consiliorum nummorum Civili Societate facultas est (1). Ad hoc, falsa moneta in vulgus semel invecta, publica destruitur fides, quae commercii anima est, cujus jactura nemo non affligitur in societate. Praeterea illud etiam discriminandum erat, falsone quis num-

(1) Heineccius *Jur. Nat. et Gent. lib. 2.*

mos conflasset , vel probos lavasset , ton-  
disset , corrupisset . Levius enim adulte-  
rare nummos , quam falsos eudere . Sed  
moras omnes lex perosa , atrox carmen  
in falsarios jacet , quo absurdissime dum  
homini vitam servat , adimit eidem adju-  
menta vitae , manus , ut inde quem honeste  
ex industria habere non licet , victum ,  
criminosus quisquam per fraudes , nova-  
que scelera comparare constituat . Quod  
ne fieret , Imperator Justinianus , hoc  
poenarum genere humanius imperavit ,  
ut una modo manus possit abscindi (2) .  
Sed jam mitiores mores a poenis hujus-  
modi recesserunt .

Tandem singulorum jura bonaque  
lex tuetur , vitam , ac famam undique  
muniendo . Et quod vitam attinet , non  
modo jura cives contra noxios tuentur  
futuri supplicii metu , sed facinus ipsum  
impediendum curant homicidii poena , et  
in eos dicta , qui , cum possent , aggres-

(1) Novella 134. cap. ult.

sum civem non defenderunt. Sane isti abjiciunt illam mutuam caritatem, qua quis alteri opem ferre adstringitur. Apposite Tullius (1) - *Sed injustitiae genera duo sunt* (inquit). *Unum eorum, qui inferunt: alterum eorum, qui ab his, quibus inferitur, si possint, non propulsant injuriam. Nam qui injuste impetum in quempiam facit, aut ira, aut aliqua perturbatione incitatus, is quasi manus afferre videtur socio: qui autem non defendit, neque obsistit, si potest, injuriae, tam est in vitio, quam si parentes, aut amicos, aut patriam deserat* - Verum officii regula non bene delicti obligationi ( quae ad poenam est ) dimetiendae attemperabitur. Ferventi pugnae se immiscere timoris plena, periculique res est, quam contemnere aliorum causa non adeo multos naturalis quidam pavor, socordiaque patiantur. Quod si poenae materies sit, infinita adsit reorum multitudo, quae legum vim, exemplo pessimo, cogat dimittere.

(1) *De Offic. lib. 1. cap. 8.*

Rectius igitur Romani crimen non impeditum generatim crimini non dabant, sed id tantum sequebantur ubi praestans aliqua sanguinis, aut officii ratio aggressi defensionem flagitabat: veluti in servo, qui dominum non defendisset ad necem petitem; item in filio, qui Patri a fratre propinatum venenum non indicasset (1). Quod vero existimationem spectat, numquam satis laudanda legis severitas, quae calumniatores, pessimum hominum genus, societatisque humanae pestem coercet. Frustra enim poenarum gladium in sontem minaris, nisi continuo innocentiae clypeo innoxium tegeris. Delicti illecebrae unae dominentur ubi innocentiae dulcedo, securitasque ignotae. Hinc Romani praeter Tallionis poenam literam K calumniatorum fronti inurebant, veteri lege Remmia,

(1) Leg. 1. §. Juxta hoc 28. Dig. ad SC. Syllanianum Leg. Frater. 2. Dig. de Lege Pompeja de Parricidiis.

ut ei perpetuo fides adempta esset : cuius legis austeritas nonnisi ab invisissimis Tyrannis , qui falsis criminationibus libidines suas explebant , praecisa est , adeo ut non erubuerit ferissimus Sylla in crimine Majestatis lege statuere faedissima haec - *Kalumniatoribus nulla poena esto* (1) -

De Parricidio ultimo loco agitur , scilicet ut hominum pravitatis fastigium ostendatur . Animo enim vix capi potest tantam in humanis mentibus perversitatem esse posse , qua quis in vitae suae authorem valeat insurgere , eumque crudelissime obtruncare . Quid hic propinquis , quid amicis , quid patriae faciat , quando nec a paterno sanguine se abstinit ? Quamobrem veteres Legumlatores crimen hoc vel silentio praeteriere , veluti Athenis Solon , Romulus Romae primordiis arbitrati sunt (2) , vel ita plecte-

(1) Sigonius *De Judiciis lib. II. cap. 29.*

(2) Plutarchus in *Romul. Ant. Augustin. ad*



runt , ut tanti facinoris horror cunctos incederet . Nota Romanorum severitas , qua sons ita puniebatur , ut ante mortem ab natura universa segregaretur ex XII. Tabularum jure cujus hoc erat carmen - *Qui Parentem necassit , caput ejus obnubito , culleoque insutus in profluentem mergitor* (2). Culleo vero postea simia , canis gallus gallinaceus inserti sunt , quibus rabie incensis , noxius laniabatur saevissime (5). Aegyptii autem supplicii aspectum auxerunt , angores minuerunt . Utrumque recte : quando ea divina fere poena habenda est in Civitate , quae , quum exemplum afferat tristissimum , sontis doloribus , quantum potest , ignoscat .

Haec de criminibus Aegyptii : quae si non aptissima in poenis statuendis quandoque reperta sunt , temporibus id tribu-

*Leg. Pomp. de Parricid.* Sigonius *de Judiciis Lib. II. cap. 31.*

(1) Gravina *Orig. Juris Lib. II. cap. 63.*

(2) Ant. Matthaeus *de Crimin. Lib. 48. tit. 5. cap. 2.*

endum est. Laudanda nihilominus sum-  
mopere illa Aegyptiorum cura, quae u-  
bique elucet, ut fides, Religio, publi-  
ca tranquillitas, hominum vita, et salus  
sanctae inter cives sint. Sed jam ad jura  
religiosa accedamus; quae complectitur

## TABULA QUINTA

### I.

NE CUI, NISI ANTEA JUDICATUS SIET,  
JUSTA PERSOLVITO. IDEM IN REGE IUS RA-  
TUM ESTO.

### II.

MORTUORUM QUAESITORES CYMBA LA-  
CUM PRAETEREUNTO.

### III.

LACU TRANSACTO, MORTUI VITAM GNO-  
SCITO SI NOXIUS ESCIT; DEDECUS: SIN-  
SONS, FUNERA HABETO.

### IV.

COGNATI, CLIENTESVE XL., VEL LXX. DI-  
ES AMPLIUS MORTUUM NE LUGEANT.

## V.

LUCTUS TEMPORE FUSCA INDUTI VESTE,  
VINO, PULMENTIS, BALNEOQUE AB-  
STINENTO.

## V I.

POST FUNES CORPORIS UNGTURA ESTO :  
UNCTUM CADĀVER DOMI SERVATO.

Religiosa jura gentibus fere omnibus fuere . Inde Tullius animorum immortalitatis argumenta sumebat in libro de Amicitia , quo Laelius habet haec - *Neque assentior his , qui nuper disserere coeperunt cum corporibus simul animos interire , atque omnia morte deleri : plus apud me antiquorum auctoritas valet ; vel nostrorum Majorum , qui mortuis tam religiosa jura tribuerunt , quod non fecissent profecto , si nihil ad eos pertinere arbitrarentur* - Id multo , Hercle , aequius in Aegyptios quadrat , qui tam anxie de funeribus curabant , ut neminem his decorarent , nisi antea de ejus vita severius judicium praecessisset ,

quod lege ita adumbratum erat, ut quid altius humana re praesferret, totiusque posteritatis fidem mereret.

Nam iudices lacum quemdā cymba transibant: portitor aegyptia lingua *Charon* audiebat, unde fortasse Charontis persona in fabulis usurpata. Lacu transacto, Quaesitores mortuorum, ab humanis rebus quasi secreti, gravissime inter se conveniebant, tum defuncti vitam, studio quovis amoto, laude, vel vituperatione dignam pronunciabant: hinc honos, vel dedecus in mortuum veniebat. Illic non gratia, opibus, vi quisquam contendere poterat: Rex ipse, uti privatus homuncio Judicum auctoritatem subibat. Quae res tum Regnantis cupiditates, superbiamque compescebat, qui aeternum dedecus formidabat, tum cives a rebus, novis turbisque arcebat, qui justitiae locum in Tyranni morte noscebant tandem futurum.

Lugendi autem tempora lege statuta sunt, ne nimio luctu pectora virorum

praeter modum mollirentur, tum longiori fletu insuetoque moeroris aspectu, mortis augetur opinio, cujus contemptui assuefieri quemquam decet, qui ad praeclara facinora virtute nitatur. Unde impatientis doloris signa XII. Tabulae amoverunt lege - *Mulieres genas ne radunto, neve lessum funeris ergo habento* - At luctus tempore apti ritus jussi sunt, quibus mortui desiderium cognati, clientesve ostenderent, atris vestibus, tum cibi, et potus, nec non delicatioris corporis curae abstinencia, ut mortalis vitae taedium significaretur.

Postremo corporis unctura jussa est, quae et apud Persas, Graecos, Romanosque obtinuit, qui servilem uncturam modo prohibuerunt. Verum hoc artificii genere Aegyptii gentes omnes superarunt, qui unguentis, balsamisque suis, humani corporis compagem a tabo ita servarunt, ut domi quisque Patris sui spirantem adhuc imaginem intueri gauderet, atque ita, nec morte se ab amatissimis conjunctis abstrahi putaret.

Modestissima haec de religiosis lege statuta sunt. Sed Regum opes morem vulgi longe praetergressae sunt. Hinc illae celebratissimae Pyramides, alias inter Orbis miracula accensitae, humanae tamen imbecillitatis, insaniaeque testes nunquam interituri, qua exiguus cinis extructis ad Coelum montibus conditus est; uti nostra quoque aetate Sinarum stultitia excellet, quorum maxima pars opum funeris sumptu absumitur (1). Inanem vero hanc sepulcrorum magnificentiam cordatissimi quique Legumlatores compresserunt, quod Athenis Solon, Romae Decemviri curarunt, de quo late habet Tullius de Legibus libro II. Non enim misera funerum ambitione, sed virtute, et benefactis posteritatis admiratio mercanda est: Idque Aegyptiis Regibus apprime contigit, quum eorum qui sepulcris extruendis adeo insudarunt,

(1) Eleganter, ut assolet, Gravina *Orig. Jur. Lib. II. cap. 78.*

ne nomina quidem innotescant ; at nulla unquam temporum fuga Meridis Regis carissimam memoriam obliteret , qui eximium lacum , *Meridis* inde dictum efformavit , quo Nili fluminis defectui , vel excessui , universi Regni commodo , apte medebatur.

Haec habui de Aegyptiorum legibus quae dicerem , quae si jejuna , mancaque forsitan reperiantur , ea tamen sunt , ut Aegyptii Regiminis formam , spiritumque valeant exhibere , quod unum animo propositum fuit .

*Audacia nobis*

*Laus erit ; in magnis et voluisse sat est .*



Jussu Rñi Patris S. P. Ap. Magistri Opusculum, cui  
titulus: *Francisci Norcia Advocati Romani Aegyptii Ju-  
ris Specimen* attente perlegi, cumque nihil in eo depre-  
henderim, quod Religioni, bonisve moribus adversetur,  
dignum quod typis edatur existimo.

Ex Monast. S. Bernardi ad Thermas Dioclet. 18.  
Aprilis 8122.

*D. Paulus Pancaldi Ab. Cist.*

---

### IMPRIMATUR

*Si videbitur Rmo P. Mag. Sac. Pal. Ap.*

J. Della Porta Archiep. Vicesg.

---

### IMPRIMATUR

Fr. Philippus Anfossi Ord. Praed. Magister  
Sac. Pal. Apost.

---

### ERRATA

### CORRIGE

pag. 14 v. 22	23	aliaquae	aliaque
30	15 16	exornabant	exornabat
31	10	publicae	publicae
6	6	quo quo	quo
48	8	queareretur	quereretur
62	23	inbribus	imbribus

H116 2013528



